

मार्निंग डोगरी न्यूज़ बुलेटिन, समें. **09-20** Hrs

Headlines

1. उपराज्यपाल मनोज सिन्हा हुंदे संबोधन पर धन्नबाद प्रस्ताह दे पाई होई जाने दे कन्नै गै जम्मू कश्मीर विधानसभा दी कारवाई अनमित्थे समें लेई स्थगत।
2. मुख्यमंत्री उमर अब्दुल्ला होरें जम्मू कश्मीर दे विशेष दर्जे ते राज्य दा दर्जा ब्हाल करने लेई आंदे गेदे प्रस्ताह गी एतिहासक करार दित्ता ऐ।
3. पुलस महानिदेशक वी.के.बिरदी होरें दस्सेआ ऐ जे श्रीनगर च संडे मार्केट च होए दे ग्रनेड हमले च शामिल लश्करे तैयबा दे त्रै आतंकवादिएं गी गिरफ्तार करी लैता गेआ।
4. प्रधानमंत्री नरेन्द्र मोदी होरें आखेआ ऐ जे रतन टाटा होरें सदा होरने दे सुखने गी सच करने लेई समर्थन दित्ता ते अज्ज ओह हर कुसै दे जीवनै नै जुड़े दे न।

<><><><><><>

Motion of Thanks

जम्मू कश्मीर विधानसभा नै कल उपराज्यपाल मनोज सिन्हा हुंदे संबोधन पर धन्नबाद प्रस्ताह मंजूर करी लैता ऐ। उपराज्यपाल होरें 4 नवम्बर गी नमीं बनी दी विधानसभा च अपना संबोधन पेश कीता हा। धन्नबाद प्रस्ताह विधानसभा सत्र दे खीरी ध्याड़े मुंह जवानी मंजूर कीता गेआ। धन्नबाद प्रस्ताह च आखेआ गेआ जे इस सत्र च किट्ठे होए दे जम्मू कश्मीर विधानसभा दे सदस्यें उपराज्यपाल हुंदे 4 नवम्बर 2024 गी विधानसभा च दित्ते गेदे संबोधन आस्तै आभारी न। सत्र गी संबोधत करदे होई स्पीकर अब्दुल रहीम राथर होरें आखेआ ऐ जे सदन दी सफलता ऐ जे उपराज्यपाल होरें अपने संबोधन च जम्मू कश्मीर आस्तै राज्य दा दर्जा ते संवैधानिक गारंटियां ब्हाल करने बारे जिक्र कीता हा। केबिनेट मंत्री सतीश शर्मा होरें आखेआ जे सरकार लोकें आस्तै कम्म करा'रदी ऐ, उससै साब्बै सरकार दी कारकरदगी दा स्हाब लाना चाहिदा। उनें आखेआ जे अस जम्मू कश्मीर दे लोकें दी मेदें गी पूरा करने आस्तै वचने बज्जे दे आं खास करियै ओ वादे तौले गै पूरे कीते जांगन जेहड़े सारे चुनावी घोशणा पत्र च शामिल हे। बारामुला विधायक जावेद हसन बेग जिनें प्रस्ताह रखेआ हा, आखेआ जे असंगी लोकें दा भरोसा थ्होआ ऐ ते एह साढ़ी कनूनी जिम्मेदारी बनदी ऐ जे अस लोकें गी शैल सरकार देचै।

<><><><><><>

मुख्यमंत्री उमर अब्दुल्ला होरें जम्मू कश्मीर दे लोकें प्रति अपन वचनबद्धता जाहर कीती ऐ ते कन्नै आखेआ ऐ जे उंदी सरकार दा अजेंडा इत्थें दे लोकें गी जरूरते दे तांगे मताबक गै होग। जम्मू कश्मीर विधानसभा दे सत्र दे खीरी दिन मुख्यमंत्री होरें किट्ठे होने दा एतिहासक महत्व, दस्सना, दौनें एजेंडे पर लोह पाई ते ओने आले समें च उपलब्धिएं बारे बी दस्सेआ। उनें आखेआ जे अज्ज दा दिन इक नमीं शुरूआत ऐ ते भविष्य दे विकास बक्खी ध्यान देना चाहिदा तां जे पिछली शुरूआत प। उपराज्यपाल हुंदे संबोधन बारे बोलदे होई अब्दुल्ला होरें साकारात्मक चर्चाएं दी मेद जताई तां जे जम्मू कश्मीर आस्तै संवैधानिक गारंटिं ते राज्य दा दर्जा ब्हाल कीता जाई सकै। बसनीकें आस्तै जमीन ते नौकरिं बारे बोलदे होई मुख्यमंत्री होरें आखेआ जे जम्मू कश्मीर दे लोक बी इज्जत माने कन्नै जीने दा हक रखदे न। उनें हाल दे प्रस्ताह गी जयरत बारे दस्सदे होई आखेआ जे एह कोइ समझौता नेई ऐ सगुआं जम्मू कश्मीर दा खास दर्जा ब्हाल करने दे धेइयै दा सनेआ ऐ।

<><><><><><>

Health Policy

मुख्यमंत्री उमर अब्दुल्ला होरें कल श्रीनगर च नमें चुने गेदे मैडिकल अफसरें गी नियुक्त पत्र सौंपे। चुने गेदे 325 मैडिकल अफसरें चा 26एं अफसरें सेहत सेवा प्रणाली च अहम भूमका दी सराहना लेइ मुख्यमंत्री हुंदे कोला नियुक्ति पत्र हासल कीते। अपने संबोधन च मुख्यमंत्री होरें घोशणा कीती जे जम्मू कश्मीर आले नमें सेहत नीति बनाई जाग। जेहदा खास मकसद ग्राएं थाहरें दी सेहत सरबन्धी जरूरतां पूरिया करना होग। उनें दस्सेआ जे नमीं नीति पैहले आली खामिं गी दूर करोग तां जे पिछड़े लोकें गी बेहतर सेहत सेवा उपलब्ध करोआइयां जाई सकन। ग्रां च सेहत सेवाएं गी सब्बने शा अग्गे रखदे होई अब्दुल्ला होरें आखेआ जे सरकार दा मकसद हर क्षेत्र तोड़ी बरोबर सेहत सेवा ते सहूलतां पजाना ऐ जेहदे कन्नै लोकें गी समें पर सेही इलाज थोई सकोग ते उनेंगी एहदे लेई लम्मा सफर तैह नेई करना पौग।

<><><><><><>

Police Arrest

पुलस नै आखेआ ऐ जे लश्करे तैयबा गुट कन्नै जुड़े दे 3 आतंकवादिं गी गिरफ्तार करी लैता गेआ ऐ, जेहड़े श्रीनगर च भीड़-भाड़ आले बजार च ऐतवार गी होए दे ग्रनेड हमले च शामिल हे। इस घटना च 12 लोक घायल होइ गे हे। जानकारी दिंदे होई आईजीपी कश्मीर बी.के.बिरदी होरें आखेआ जे श्रीनगर पुलस ते 3 आतंकवादिं गी गिरफ्तार करियै एह मामला सुलझाई दित्ता ऐ। गिरफ्तार कीते गेदे जने इखराजपोरा दे रौहने आले न, जिनें पाकिस्तान थमां इशारा थोने पर इस घटना गी अंजाम दित्ता तां जे शांतिपूर्ण माहौल च खलल पाई जाए। कनूनी गतिविधिं दी रोकथाम सरबन्धी कनून हेठ यूएपीए इनें त्रैनें खलाफ मामला दर्ज कीता गेआ।



Div.Com

जम्मू दे डिवीजनल कमीशनर रमेश कुमार होरें सब्बने जिला विकास कमीशनरें दी इक बैठक दी अध्यक्षता करदे होई औंदे सयाल लेई तैआरिएं दी समीक्षा कीती। बैठक बक्ख—बक्ख मैहकमें दे अध्यक्ष बी मजूद हे। बैठक दरान उनें जम्मू प्रांतै दे पहाड़ी ते बफबारी आले इलाके च सयाले दरान जरूरी बंदोबस्तें, बिजली पानी दी सप्लाई, बर्फ हटाने दे प्रबंध, राशन, रसोई गैस, इंधन ते होर दुए जरूरी सेवाएं सुविधाएं दे बारे च जफसीली जानकारी हासल कीती। उनें जम्मू प्रांतै दे सब्बने जिलें च राशन, गैस ते होर दुइए जरूरी चीजें दा स्टॉक पैहले गै जमा करी लैने दा निर्देश दित्ता। उनें मैहकमा पीडब्ल्यूडी, जरनैली सड़क प्राधिकरण, सीमा सड़क संगठन ते सरबंधत होरने मैहकमे कन्नै सड़कें दे रख—रखाव दे बारे च चेचे तौरा पर गल्लबात कीती ते आखेआ जे सर्दिएं च लोकें गी आओजाई च कोई नेई औनी लोड़चदी। मीटिंगा च दस्सेआ गेआ जे हर जिले लोकें दिएं दिक्कतें शकैतें गी सुनने ते जरूरी सेवाएं दी ब्हाली लेई दिन रात 24 घंटे कम्म करने आले कंट्रोल रूम बनाए जांगन।



Guru Purab Prep Jammu

श्री गुरु नानक देव हुंदे 555में प्रकाशोत्सव गी मनाने लेई जम्मू जिला प्रशासन तैआरिएं च लग्गे दा ऐ। एडीसी अनुसुइया जम्वाल हुंदी अध्यक्षता च कल लग्गी दी इक बैठक च गुरु पर्व दिएं तैआरिएं दी समीखा कीती गोई जेहदे च आयोजन आली थाहरे पर बिजली पानी दी बवस्था, साफ सफाई, गडिडएं दी बवस्था आले ढंगै सिर आओजाई लेई प्रबंध ते सुरक्षा बंदोबस्तें बारे सलाह सूत्र शामन हा। बैठका च मैहकमा बिजली, पानी, ट्रैफिक, अगग स्हालने आला विभाग, पुलस, नगर निगम ते सरबंधत होरने इदारे दे प्रतिनिधि बी शामिल हे।



PM-Ratan Tata

प्रधानमंत्री नरेन्द्र मोदी होरें आखेआ ऐ जे सुरगवासी रतन टाटा हुंदे जीवन थमां एह प्रेरणा थ्होंदी ऐ जे सच्चे नेतृत्व दा आकलन कुसै दी उपलब्धि कन्नै नेई सगुआं सब्बने शा कमजोर माहनुएं दा ख्याल रखने दी ओहदी समर्थ कन्नै हुंदा ऐ। इक राश्ट्री दैनिक च छपे दे अपने लेख च श्री मोदी होरें आखेआ जे रतन टाटा होरें गी पूरा होए दे इक म्हीना होई गेआ ऐ पर उंदी गैर मजूदगी ना छड़ी भारत च सगुआं दुनिया भरै च समाज दे हर वर्ग गी मसूस होआ करदी ऐ। श्री मोदी होरें आखेआ जे रतन टाटा होर ओकड़े लोकें दिएं यादें च सदा जींदे रौंहगन जिंदे लेई उनें कम्म कीता ते सुखने बने। उनें आखेआ जे मन्ने परमन्ने दे उद्योगपति, उभरदे होई उद्यमी ते मेहनती कारोबारी उंदे जाने दा सोग मनाह करदे न। उनें आखेआ जे रतन टाटा होर युवाएं

लेई प्रेरणा हे ते ओह इस गल्लै दे प्रजीक ही जे सुखनें गी सच कीता जाई सकदा ऐ ते दया ते मनुक्खता दे कन्नै कामसयाबी हासल कीती जाई सकदी ऐ। प्रधानमंत्री होरें इस गल्ले पर लोह पाई ते रतन टाटा होर राष्ट्र दे स्टार्टअप तंत्र दा नेतृत्व करने लेई मशहूर होई गे हे।

<><><><><><>

Organic Farming Training

राई-बाई निदेशालय जम्मू आस्सेआ रीजनल काउंसल पीजीएस इंडिया जम्मू दे प्रमाणन अफसर दे सैहयोग कन्नै करसानें लेई जैविक खेती दे बारे च इक सिखलाई कार्यक्रम दा सरिस्ता कीता गेआ। कार्यक्रम दा मकसद करसानें गी रिवायती कुदरती ढंग सरिस्ते राएं खेती बाड़ी करने लेई जागरूक ते प्रोत्साहित करना हा। सिखलाई कार्यक्रम दरान राई-बाई निदेशक जम्मू सरदार अरविंदर सिंह रीन होरें जैविक खेती ते फायदे ते ते महत्व पर लोह पाई जेहदे नै मते पोष्टिक ते उच्च मयार दे अनाज दा उत्पादन कीता जाई सकदा ऐ जेहदा मतर सेहतमंद होंदा ऐ ते करसानें लेई मती औंदन दा जरिया बी बनदा ऐ।

<><><><><><>

Book Release(byte)

जम्मू कश्मीर राष्ट्र भाषा प्रचार समिति जम्मू आस्सेआ आयोजित इक समारोह च कल संजा चूनी लाल शर्मा हुंदी हिंदी कताब “प्रकाश पथ” दा विमोचन कीता गेआ। डोगरी संस्था दे प्रधान प्रो. ललित मगोत्रा हुंदी अध्यक्षता च लग्गे दे इस कार्यक्रम च डोगरी, हिंदी ते अंग्रेजी दे नामवर लखारी ते कवि पदमश्री डॉ. जितेन्द्र उधमपुरी मुख्ख परौहने हे, जिसलै के डॉ. बरविंदर सिंह अमन ते डॉ. भारत भूशण शर्मा इस कार्यक्रमे च बतौर चेचे परौहले मजूद हे। जीवन च नैतिक मुल्लें कट्रें दे महत्व पर लोड़ पानी अपनी इस कताब बारे गल्ल करदे होई चूनी लाल शर्मा होरें आखेआ.....बाईट

<><><><><><>

Ramban Rescue Jammu

रामबन जिला प्रशासन आस्सेआ समाज च मजूरी करने आले, भिक्ख मंगने आले ते आवारा फिरने आले बेस्हारा बच्चें दी भलाई बेहतरी लेई इक राहत ते पूर्नवास अभियान दी शुरूआत कीती गई जेहदे इक इक कार्जबल दा गठन कीता गेआ ऐ। इस कार्जबल च असिस्टेंट लेबर कमीशनर अमित कुमार ते जिला बाल कल्याण कमेटी दियां अध्यक्ष निगत गनी हुंदे इलावा मैहकमा सेहत, जिला पुलिस, चालु हैल्पलाइन दे सदस्य बी शामिल न। इस पैहल दा मकसद बच्चे कोला कम्म मंजूरी करोआने आले खलाफ कारवाई करना ते समाज दे इने बेगौरे बच्चें गी मुख्ख धारा च शामिल करियै अपने पैरे पर खड़ा करना ऐ।

<><><><><><>